

«En nagin cas ina Berlusconiisaziun»

Radunanza generala da la SRG.R

DA GION NUTEGN STGIER / ANR

■ **En il center da l'occurrèza è stada la surdada dal premi 2017 da la societad purtadra al comité dals Dis da litteratura. En l'avegnir duai RTR daventar anc pli multimedial ed ultra da quai s'avischinar pli fitg als auditurs.** A La Punt-Chamues-ch èn s'inscuntrads radund 80 commembers da la societad purtadra dad RTR, la SRG.R. Beneventada è la raspada vegnida d'*Oscar Knapp*, il president da l'organisaziun, e lura er da *Hans Barandun*, il vicepresident da la vischnanca ospitanta. Onur cun sia preschientscha ha er fatg *Barbara Janom Steiner*, la presidenta da la regenza. En ses pled ha ella cunzunt fatg attent a las grondas midadas da nossa societad. La cussegliera guvernativa ha ditg che er las medias hajan da s'adattar a quell'as midadas per porscher cunzunt a la generaziun giuvna la tempra dad oz.

Chors – sport regional – chatscha

Ladina Heimgartner, la directura dad RTR, ha ditg ch'els 170 collavuraturs prestian buna lavur e ch'il Radio Rumantsch saja tar ils Rumantschs anc adina il radio che vegnia tadlà il pli bler. 79 000 persunas taidlan almain ina minuta per di Radio Rumantsch. Las contribuziuns digitalas sin la pagina d'internet dad RTR, quell'as sveglian bunamain da di tar di adina dapli interess. En il futur survegnia la purschida multimediala e digitala (videos, clips, films) anc ina pli gronda plattafurma sin la pagina d'internet dad RTR. Anc dapli muntada vul RTR er dar als chors, al sport regional ed a la chatscha, trais temas fitg impurtants en l'intschess rumantsch.

Cun «No Billag» nagin RTR

L'acceptanza da l'iniziativa «No Billag» fiss bunamain la mort per RTR, ha punctuà Knapp, el che resta anc in onn president da la Societad SRG.R. Da porscher vinavant ina purschida uschè vasta, saja quai en pled ubain maletg, fiss segir na pli pussaivel senza la taxa fundamentala e federala per radio e televisiun. Da surlaschar ra-

dio e televisiun ad organisaziuns privatas fiss en vair senn ina catastrofa, ha menziunà Knapp. «Nus vulain en nagin cas ina Berlusconiisaziun», ha accentuà il president da la Societad SRG.R. Per ch'il suveran refusia l'iniziativa saja urgent d'infurmar e far attent mintgin tge ch'i vegnia tut prestà dad RTR e da la SRG cun ses differents secturs.

Per l'empirma giada va il premi ad ina organisaziun

Il punct culminant da l'occurrèza da sonda passada a La Punt-Chamues-ch è lura stada la surdada dal premi 2017 da la SRG.R. Dapi il 1960 undrescha ella personalitads che s'engaschan per la cultura e per la lingua rumantscha. Per l'emprima giada en sia istorgia ha



Plaschair dal premi: Iso Camartin, Benedetto Vigne, Laura Decurtins, Natalia Tuor, Francesca Sara Hermann ed Oscar Knapp (da san.).

la SRG.R surdà il premi dotà cun 8000 francs ad ina organisaziun. Retschet quel han sonda passada cun *Laura Decurtins*, *Sara Francesca Hermann* e *Natalia Tuor*, sco represchentantas dal comité dals Dis da litteratura a Domat, l'organisaziun ch'è vegnida undrada cun il premi da quest onn. Preschent era dentant er *Benedetto Vigne*, il 1990 in dals iniziants principals dals Dis da litteratura.

Grazia fitg per quella renconuschientscha

Cun plaschair han las trais dunnas retschet il premi e cun in carisma singular ha lura Sara Francesca Hermann engrazià per quella renconuschientscha. Ella saja davairas stada in surpraisa per il comité d'organisaziun, dentant ina bainvesida. Il premi saja er ina apprezzaziun per la lavur da tut las persunas che sajan s'engaschadas fitg per ils Dis da litteratura e lura er per tuts quels che s'engaschan vinavant per quella occurrèza da litteratura a Domat. Lieu han ils dis 2017 dals 3 fin ils 5 da november ed a star vegnan els sut il titel «gieus».

Bunamain Nadal e Pasca ensemen

La laudatio ha tegnì *Iso Camartin*. El ha ditg che litteratura saja ina chausa intima e quai betg mo per l'autur, ma bain er per il lectur. Camartin ha cumpareglià ils Dis da litteratura cun il «Tridum Sacurm» ch'ins enconuscha da l'emna sontga, ils dis da gievgia sontga fin Pasca. Per la Rumantschia saja l'occurrèza da Domat er bunamain sontga e per scribents, auturs ed er lecturs sajan quels schizunt Nadal e Pasca ensemen.